

TUTÚ CÚÚ ÒÚ NÍ CADÚHA TÉ PÈLÚ

Té Pèlú cáďũha-dé tutú quĩhíⁿ ndaha ñáyiú sàndáá iní tnúhu Yá Ndiõxí

¹ Yúhú té Xǐmú, àdi Pelú chi úú òú-í, xínú cuèchi núú Xǐtohó Jesucrístú, chi mee-gă ní tendaha ñaha-gă xii-í xícá cùu-í càháⁿ-í tnúhu-gă. Te càďuha-í tutú-a sá cúú-xí nchàa nchohó ñáyiú sàndáá iní ñáhá xii-gă dàtná sàndáá iní-ndí-gă, te ducaⁿ chi Tătá-ó Dűtú Ndiõxí ní dácàháⁿ-gă iní-ó nǐ sàndáá iní-ó-gă, chi cùu-gă Yaá ío váha quide ndáá ndihí Xítóhó Jesucrístú Yaá dácăcu nihnu ñaha xii-o núú òhú núú ndàhú. ² Te xícáⁿ táhù-í núú Yă Ndiõxí sá òuⁿ-gă uuⁿ-gă ná cuíta chindee chitúu ñaha-gă xii-ndo quĩhíⁿ, te ducaⁿ òo váha cuu iní-ndó cùndecu-ndo, te ducaⁿ càda-gă chi ta cùtnuní-gă iní-ndó nàcuáa ndùu cuendá-gă, te ducaⁿ ta cùtnuní tucu iní-ndó nchàa nacuáa ndùu cuendá Xítóhó Jesucrístú Yaá cúú Xítóhó-ó.

Nàcuáa quide ñáyiú ndècu ichi Xítóhó Jesucrístú

³ Te Yá Ndiõxí ío càhnu cuu-gă chi chindee ñaha-gă xii-o quide ndáá-ó ndècu-o datná cuíní mée-gă, te ducaⁿ chi cùtnuní iní-ó nàcuáa sàni iní Xítóhó Jesucrístú Yaá ní càháⁿ ñáhá xii-o. Te òré ní càháⁿ ñáhá-gă xii-o te ní cutnùní iní-ó sǎ òo càhnu cuu-gă te ío váha quide-gă. ⁴ Te ducaⁿ nǐ cutnùní tucu iní-ó nàcuáa ní càháⁿ-gă cada ñaha-gă xii-o, te tnúhu ní càháⁿ-gă-áⁿ òo càhnu cuu-xi te ío váha, te nchoo nǐ sàndáá iní-ó tnúhu-áⁿ nùu xǎⁿ ñá túú-gă ndécú-ó

ìchi cuehé ichi duha te ni ñà túú-gã sání iní-ó cãda-o nãndi sá cuèhé sá dúhá, te ní cuu vii ní cuu váha iní-ó vìtna. ⁵ Te sá dúcáⁿ quide-gá te xíãⁿ ío nducu ndèe-ndo cada-ndo nchaa nacuáa cãháⁿ-í-a, te nchòhó sãndáá iní-ndó-gã dico ñá díú mèe-ni xíãⁿ chi tnàhá xíní ñùhu-xi cada ndáá-ndó cùndecu-ndo. Te núu quide ndáá-ndó ndècu-ndo te xìni ñùhu-xi tecú tnùní-ndó tnùhu-gá. ⁶ Te núu tècú tnùní-ndó te cùu-ndo ñáyiu xíní cotnì mee-xi, te núu cùu-ndo ñáyiu sàcáo tnì mee-xi te xìni ñùhu-xi cunduu cahnu iní-ndó cuèi nãndi sá ná yãha-ndo cùndecu-ndo, te núu cãhnu iní-ndó te xìni ñùhu-xi cada ndáá-ndó cùndecu-ndo datná cuìní mée Yã Ndiõxí cada-ndo. ⁷ Te núu quide ndáá-ndó ndècu-ndo, te xìni ñùhu-xi ío cuu iní tnàhá ndì mee-ndo nacuáa ndècu-ndo ichi-gá, te núu cùu iní tnàhá ndì mee-ndo te xìni ñùhu-xi cuu iní-ndó nchaa dava-gá tnàha ñáyiu-ndo.

⁸ Te núu sa ducaⁿ quide-ndo ndecu-ndo te uuⁿ-gá cuita ducaⁿ cãda-ndo quíhíⁿ núú cuàháⁿ núú vëxi, te núu ducaⁿ quide-ndo te cùu-ndo cue ñáyiu ñá túú dàna iní-xi xĩndecu, te cuita cutnùní-gá iní-ndó nchaa nacuáa sàni iní Xítóhó Jesucrìstú quíhíⁿ. ⁹ Te nchaa ñáyiu ñá túú cuìní ducaⁿ cãda cuú-yu ñáyiu ñá túú tnàhí ndìxi túu iní-xi sá Yã Ndiõxí sa ní ndada ndoo ní ndada nine-gá iní-yu cuendá nchaa sá cuèhé sá dúhá ñi xóo cadá-yu, te ñáyiu-án cúu-yu dàtná ìⁿ ñáyiu cuáá àdi datná ìⁿ ñáyiu ñá túú cùtnuní váha núú-xi, te ducaⁿ sãtnahá-xi cuú-yu cuendá sá dúcáⁿ quidé-yu. ¹⁰ Te xíãⁿ núu yúhú cãháⁿ-í dóho nchaa nchòhó ñáyiu ndècu ichi Xítóhó Jesucrìstú, te ío nducu ndèe-ndo cada váha-ndo cùndecu-ndo cuendá cutnùní ndáá

iní-ndó sǎ Yǎ Ndiǒxí ní cáháⁿ ñáhá-gǎ xii-ndo, te ducaⁿ ñǐ quide-gǎ chi ducaⁿ ñǐ cachí-gǎ cada-gǎ. Te vá ǐⁿ ndùu cani iní-ndó dàña-ndo ichi-gǎ, te núu vá dáñá ndée-ndó càda-ndo nchaa nacuáa càháⁿ-í-a. ¹¹ Te núu ducaⁿ na càda-ndo cundecu-ndo, te ío vii ío váha cada Yǎ Ndiǒxí queheⁿ cuendá ñáhá-gǎ xii-ndo òré ná sàá-ndó núú ndécú Xítóhó Jesucristú táxí tnùnǐ-gǎ nchaa nduu nchaa quíú, te diu-ni Yaá-ǎⁿ cúú Xítóhó-ó te ní dácǎcu nihnu ñaha-gǎ xii-o núú ùhú núú ndàhú.

¹² Te ducaⁿ-ni quíhi-í dandàcu iní ñáhà-í xii-ndo nchàa tnúhu càháⁿ-í-a cuèi sa xini-ndó tnúhu-ǎⁿ, te cuèi sàndáá váha iní-ndó nchàa tnúhu ndáá dácùàha-ndo. ¹³ Te yúhú quidé cuendá-í sǎ ío tàú-xi cáháⁿ-í dóho-ndo ñini ndecu-í ñuyíú-a cuendá sǎ vǎ nácuànaa-ndo nacuáa cada-ndo cundecu-ndo. ¹⁴ Chi Xítóhó Jesucristú ní cachí-gǎ sǎ ñà túú-gǎ vǎi nduu cundecu-í ñuyíú-a te cuú-í. ¹⁵ Te ío nducu ndèe-í nducu-í nàcuáa cada-í cuendá quendóo ndíhi-ndo nchàa tnúhu càháⁿ-í-a, te cuèi na yǎha cuú-í dico vá nácuànaa-ndo cada-ndo nchaa nacuáa càháⁿ tnúhu sǎ dánèhé ñáhà-í xii-ndo vìtna.

Cue téé ní xini núú sǎ ío càhnu cuu Xítóhó Jesucristú

¹⁶ Te sa ní dánèhé ñáhá-ndǐ xii-ndo sǎ ío càhnu cuu Xítóhó Jesucristú. Te ní cachí tnúhu tucu-ndǐ nàcuáa cada-gǎ òré quixi tucu-gǎ, te tnúhu-ǎⁿ cúú-xí tnúhu ndáá cuiti te ñà díú tnúhu sǎ ñǐ sani iní cue ñáyíu ñuyíú-a cùu-xi, chi nchúhú ní xini núú-ndǐ nàcuáa ní quide-xi cútnàhá ní cutnùnǐ iní-ndǐ sǎ ío càhnu cuu Xítóhó Jesucristú. ¹⁷ Chi dàvá-ǎⁿ ío váha ní quide Tǎtá-ó Dútú Ndiǒxí ní

quide càhnu-gá Xítóhó Jesucrìstú, te òu-ni dàv-á-án nĩ cáháⁿ Dútú Ndiöxí ndéé andiú nĩ xáhaⁿ-gã xii Xítóhó Jesucrìstú: “Yòhó cúú-n Dèhe-í téé ío cùu iní-í, te ío cùdíí iní ñáhà-í xii-n”, duha ní xáhaⁿ Yă Ndiöxí xii Xítóhó Jesucrìstú. ¹⁸ Te nchúhú ní tecú dóho-ndí ní cáháⁿ Yă Ndiöxí ndéé andiú cùtnàhá ducaⁿ nĩ xáhaⁿ-gã xii Xítóhó Jesucrìstú, chi tnàhá-ndí ndécú-ndí ndihi-gá yucu núú dúcáⁿ nĩ quide càhnu ñaha Yă Ndiöxí xii-gá.

¹⁹ Te ndècu ndihi-o nchaa tnúhu ní cáháⁿ cue téé ní xóo cáháⁿ tnúhu Yă Ndiöxí ndéé sanaha te nchaa tnúhu-án càháⁿ-xi nchaa nàcuáa cada-xi vitna, te cùtnuní iní-ó sã tnúhu ndáá cúú-xí, te xini ñuhu-xi cada cuendá váha-ndo nchaa nacuáa càháⁿ tnúhu-án, chi tnúhu-án cúú-xí dàtná ñⁿ ñuhú dáyèhé-xi ndéé òré véxi túndaá quéné chòdíní cáhnú dáyehé-di. Te ducaⁿ sãtnahá-xi cùu tnúhu-án chi quide-xi nacuáa cutnùní iní-ó cuendá Xítóhó Jesucrìstú. ²⁰ Te xini ñuhu-xi sá òo-gá cada cuendá-ndó sã ñà túú ñáyiú tecú tnùní ní ñⁿ tnúhu sá nĩ chídó tnùní cue téé ní cáháⁿ tnúhu Yă Ndiöxí ndéé sanaha, te núu Yă Ndiöxí vá cadá-gã nàcuáa cutnùní iní-yu nàcuáa càháⁿ nchaa tnúhu-án. ²¹ Te cue téé-án òo ní xíndecu yiñuhu-güedé núú Yă Ndiöxí, te nchaa tnúhu sá nĩ cáháⁿ-güedé-án ñà túú cùu-xi tnúhu sá nĩ cahu iní méé-güedé, chi Espíritú Yă Ndiöxí ní dácáhu iní ñáhà-xí xì-güedé nàcuáa cunduu tnúhu cáháⁿ-güedé.

2

Cue téé càchí sá càháⁿ tnúhu Yă Ndiöxí te ñà ndáá

¹ Te ndéé sanduu chi ní xíndecu cue téé ní xóo dandàhú ñáhà xì ñáyiú israhél càchí sá càháⁿ

tnúhu Yá Ndiöxí te ñá ndáá sá cáháⁿ-güedé tnúhu-gá, te diu-ni ducaⁿ tucu cundecu cue téé dandàhú ñáhá xii-ndo vitna, chi cachí-güedé sá cáháⁿ-güedé tnúhu Yá Ndiöxí te ñá ndáá. Te cue téé-áⁿ ïo yidáhu cáháⁿ-güedé, te nchaa tnúhu cáháⁿ-güedé-áⁿ dacuíta nihnu ñaha-xi xii-ndo te núu na tédóho-ndo, chi cue téé-áⁿ vǎ nūnuu-güedé sá Xitohó Jesucristú ní xihí-gá cuendá-güedé. Te sá dúcáⁿ càda-güedé ío-gá ndǐhi dacuíta nihnu-güedé méé-güedé.² Te vǎi ñáyiú xínu iní-yu cadá-yu nándi sá cuèhé sá dúhá cuendá sá dúcáⁿ càda cue téé-áⁿ, te cuendá xiǎⁿ ngóo ñáyiú cáháⁿ úhú-yu cuendá ichi Yá Ndiöxí.³ Te mee-ni tnúhu sá ñi cahu iní cue ñáyiú ñuyíú-a danèhé ñáhá-güedé xii-ndo, te quesaha-güedé sá cúú-xí tnúhu ndáá te ñá ndáá cuendá-ni sá cuǎñaha-ndo dǐhúⁿ xii-güedé, chi diu-ni xiǎⁿ tnàhí cuhuⁿ iní-güedé, dico Yá Ndiöxí sa ní cunaha ndècu túha-gá cuendá cada ndáá-gá cuéchi-güedé, te na sǎá nduu te cuíta nihnu duuⁿ-güedé, chi Yá Ndiöxí vá nácuànaa-gá ïⁿ sá ñi cachí-gá cada-gá.

⁴ Te Yá Ndiöxí ñá túú ní quide cahnu iní-gá sá ñi quide cue espíritú ñá túú ní cuini cada ndáá xínu cuèchi núú-gǎ ní cùu, chi ní dáquihíⁿ ñáhá-gǎ xii-xi ïⁿ xichi núú ïo ndòho-xi ndecu-xi, te xiǎⁿ cundedí nihnu-xi ndéé sǎá nduu cuíta nihnu duuⁿ-ná-xi.
⁵ Te Yá Ndiöxí ñá túú ní quide cahnu tucu iní-gá nchaa sá ñi quide ñáyiú ñuyíú dǐhna, chi dàvá-áⁿ ñi dándáá-gǎ ndute ñuyíú ñi cáhá nchaa ñáyiú ndècu ichi cuehé ichi duha te ïⁿ dǐi-ni té Nöé ndǐhi úsá-gá tucu cue ñáyiú cùu ndi mee-dé ní dácǎcu nihnu-gá. Te té Nöé-ǎⁿ cúú-dé téé ní cáháⁿ dóho-yu nàcuáa cada váha-yu cundecú-yu ni cùu te ñá túú

ní cuení-yu. ⁶ Te Yá Ndiöxí ní dängává-gă ñuhú ní dánáá-gă ñáyiú ñuú Sòdomá ndihí ñáyiú ñuú Gòmorrá te mee-nă yáá nǐ nduu ñuú-án. Te sá dúcáⁿ nǐ cuu xiǎⁿ cútnùní iní-ó nàcuáa cada ñaha Yá Ndiöxí xii nchaa ñáyiú ñá túú quide váha. ⁷ Dico té Löt té ní quide ndáá ní xíndecu ñⁿ ñuú-án dává-án chi ní dácăcu nihnu ñaha-gă xii-dé. Te nchaa ñáyiú ñuú núú nǐ xíndecu-dé-án ïo ní xínduu cuihna iní-yu, te mee-ni ìchi dǐí ìní ní xíndecú-yu, te sá dúcáⁿ nǐ xóo cadá-yu xiǎⁿ ïo ní ndíhú iní té Löt. ⁸ Te ñⁿ nduu ñⁿ nduu ní xóo cada ndàhú-xi iní té Löt-án cuendá nchaa tnúhu cuèhé tnúhu duha ní xóo cáháⁿ-yu ní xóo cundedóho-dé, ndihí cuendá nchaa sá cuèhé sá dúhá nǐ xóo cadá-yu ní xóo quini-dé, te mee-dě ní cuu-dé ñⁿ té ní xínduu vii ní xínduu váha iní-xi núú Yá Ndiöxí. ⁹ Te sá dúcáⁿ nǐ yáha té Nöé ndihí té Löt, xiǎⁿ cútnùní iní-ó sǎ Yá Ndiöxí ïo chindee-gá cue ñáyiú quide ndáá ndécú ìchi-gá cuendá sá vǎ cadă-yu nándi sá cuèhé sá dúhá cuèi nándi na ndòhó-yu cundecú-yu. Te Yá Ndiöxí càchí-gá sá ncháá ñáyiú ndècu ìchi cuèhé ìchi duha sa ndècu túha-yu sá quíhíⁿ-yu núú ùhú núú ndàhú nduu nà yáha cundáá cuéchi-yu.

¹⁰ Te uuⁿ-gá cada ñaha Yá Ndiöxí xii nchaa cue té ndècu ìchi dǐí ìní, te dàquee tíhú-güedě nchaa tnúhu sá sánú ìchi ñaha xii-o nacuáa cada-o cundecu-o, te cùu-güedé cue té ñíí iní-xi, te yíí iní-güedé, te ñá túú yùhú-güedé cáháⁿ úhú-güedé cuendá nchaa espíritú cúnúu. ¹¹ Te cue espíritú xínú cuèchi núú Yá Ndiöxí ïo cùn uu-xi dacúúxí cuè té-án, dico ñá túú cùyí-xi cáháⁿ-xi dàtná càháⁿ cue té-án òré ndàcáⁿ cuèchi-xi núú Yá Ndiöxí cuendá nchaa sá quidé cuè espíritú cündihí yucu ñáváha.

¹² Te nchaa cue téé dandàhú ñáhá xii-ndo-án cúú-güedé dàtná cue quiti, chi cue quiti-án ñá túú ndècu sá xini tnúni-güedi, chi cue quiti-án ní cacu-güedi sá tñí-ó-güedi te cahni-o-güedi. Te ducaⁿ sãtnahá-xi cùu nchaa cue téé-án, chi cãháⁿ cuèhé-güedé cuendá ndédani cãa espíritú cuèi ñá túú xini-güedé ná espíritú cúú-xi, te diu-ni mee-güedé dácũta nihnu-güedé mée-güedé sá dúcãⁿ quide-güedé, ¹³ te sáá nduu te nacháhu-güedé nchaa sá quide-güedé-án, te cuèi nduu cuèi niú cúdí^í ini-güedé quide-güedé nchaa núú sã cuèhé sá dúhá sãni ini-güedé. Te òré nàtacá-ndó càda-ndo ìⁿ vico chiñuhu-ndo Yá Ndiõxí te chitnahá ñáhá-güedé xii-ndo, te cada dusaⁿ-güedé sá cúdí^í ini-güedé sá dándàhú ñáhá-güedé xii-ndo, te dicó sácãⁿnúu cuãha ñaha-güedé xii-ndo dùcaⁿ na cada-güedé.

¹⁴ Te nchaa cue téé-án òré xini-güedé ìⁿ ñáyiú dìhí te ndíhi-ni sãni ini-güedé cãháⁿ ndíhi ñaha-güedé xii-yu, te ñá túú ndúu vétú ini-güedé cuendá nchaa sã cuèhé sã dúhá quide-güedé chi uuⁿ-gã uuⁿ-gã sãní ini-güedé cada-güedé. Te cuáhãⁿ-güedé dándàhú-güedé nchaa ñáyiú ñá túú nihí ndéé càda ndáá cuendá canchicúⁿ nihnú-yu nchaa tnúhu cãháⁿ-güedé. Te mee-ni nchãa sã ndécú ndíhi tnaha ñáyiú-güedé cúú ini-güedé, te cue téé-án cúú-güedé cue téé duuⁿ duuⁿ sa ní xita nihnu núú Yá Ndiõxí. ¹⁵ Chi cùu-güedé cue téé vá cãní-gã ini-xi cada ndáá, te nchicúⁿ nihnu-nã-güedé quide-güedé nàcuáa ní xóo cada ndíi Bàlaám déhe ndíi Bèór, chi ndíi Bàlaám-án ní xóo tnahá ini ndíi cada ndíi chiúⁿ cuèhé nàcuáa ní xóo níhí ndíi díhúⁿ. ¹⁶ Te Yá Ndiõxí ní quide-gã ní cãháⁿ búrru ndíi ní tenáa ñáhá-dí xii

ndíi cuèndá sá vǎ cádá ndíi ìⁿ cuéchi sàni iní ndíi cada ndíi ni cùu. Te sá dúcáⁿ nǐ cuu xǎⁿ ní nguítuu ndíi ñá túú ní quìde ndíi ìⁿ sá ñà túú nàndíhi sàni iní ndíi ni cùu.

17 Te nchaa cue téé ducaⁿ xǐquide cùu-güedé dàtná ìⁿ doco yìchí, te cùu tucu-güedé dàtná ìⁿ vícò sǎ xídó táchí te ñá túú dǎú nchídó-xí, te sa ndècu túha ìⁿ xichi núú ìo nee quíhíⁿ-güedé cundecu-güedé ni caa ni quíhíⁿ. 18 Te cue téé-án càháⁿ-güedé dàtná càháⁿ ìⁿ téé ío cùu cahnu dico ñá túú vèdana nàndíhi nchaa tnúhu càháⁿ-güedé, te cue téé-án dándàhú-güedé nchaa ñáyíu íchí nǐ dáñá ìchi cuehé ichi duha, te xǎhaⁿ-güedé xíi-yu sá cúú-ní càdá-yu nchaa sá cuèhé sá dúhá quìde nchaa ñáyíu ndècu ichi díí iní, 19 te xǎhaⁿ tùcu-güedé sá cúú-ní càdá-yu nání véxi iní-yu cuèi sá vǎha te cuèi sá cuèhé, dico mee-güedé chi mee-ni sǎ cuèhé sá dúhá cùnū quìde-güedé. Te nchaa ñáyíu ñá ndácú dàña nándi sá cuèhé sá dúhá cùú-yu dàtná ìⁿ ñáyíu xínu cuechi ñá túú tnàhí dàña quee núú chíúⁿ pàtróóⁿ-xí. Te ducaⁿ sǎtnahá-xí cùú-yu chi ñá ndácü-yu dàñá-yu nándi sá cuèhé sá dúhá quìdé-yu. 20 Te núu ñáyíu sa ní dáñá nchaa ichi cuehé ichi duha cuèndá sá nǐ cutnùní iní-yu nàcuáa ndùu tnúhu Xítóhó Jesucrístú, Yáá ní dácácu nihnu ñaha xìi-o núú ùhú núú ndàhú ná nànchocáva iní-yu cundecu tucú-yu ichi cuèhé ichi duha, te mee-nǎ sá cuèhé sá dúhá tàxi tnuní ñáhá-xí xíi-yu, te núu ducaⁿ te vǎa-gá tucu cadá-yu dàcúúxí dàtná ní xóo cadá-yu cùtnàhá vátá cùtnùní-gá iní-yu nàcuáa ndùu tnúhu-gá. 21 Te váha-gá sá vǎ ngūnu íchí-yu ichi ndáá ní cùu te ñá díú sǎ sá ní ngūnu íchí-yu te

ní dǎǎ-yu nchaa tnúhu-gá sá sà ní níhǐ-yu ndècu ndihí-yu sànu ichi ñaha-xi nacuáa cundecú-yu ni cùu. ²² Te ñáyi ducaⁿ xǐquide quèe ndáá-xi nàcuáa cuáháⁿ ñⁿ cuèndú sá càchí-xi: “Iná ní nacaxi-dì sá ñí ndusaⁿ-dì, te cùchí quiti íchí ñí xichi ndute càndoo cuáháⁿ-ni tucu-dì cuchi ñuhu-dì núú ndèhyú”, duha cuáháⁿ cuèndú-áⁿ.

3

Xítóhó Jesucristú quixi tucu-gá

¹ Te nchaa nchòhó ñáyiú ío cùu iní-í cùtnuní iní-í sá ño váha sàni iní-ndó, te xéhé cúu-xí tùtú cúu úú cǎdǔha-í sá cúu-xí-ndó, te ñⁿ-ni càháⁿ-í dándàcu iní ñáhà-í xii-ndo nchàa tnúhu sá sà ní xíndedóho-ndo.

² Chì cuìní-í sá vǎ nàcuànaa-ndo nchaa tnúhu ní cáháⁿ nchaa cue téé ní xóo cáháⁿ tnúhu Yá Ndióxi ndéé sanaha, te ni vǎ nàcuànaa-ndo nchaa tnúhu ní cáháⁿ cue téé ní cáháⁿ tnúhu Xítóhó Jesucristú Yá ní dǎcǎcu nihnu ñaha xii-o núú ùhú núú ndàhú, chì ñi nchaa tnúhu-áⁿ sánú ìchi ñaha-xi xii-o nacuáa cada-o cùndecu-o.

³ Te ío-gá xíní ñuhu-xi cutnuní iní-ndó nàcuáa cada-xi òré vátá sàá-gá nduu quixi tucu Xítóhó Jesucristú ñuyíú-a, te càchí tnúhu-í xii-ndo sǎ cùndècu ñáyiú cuhuⁿ iní mee-ni nchàa sá cuèhé sá dúhá te mee-ni xǎⁿ cadá-yu, te cáháⁿ cuèhé cáháⁿ duhá-yu cuèndá tnúhu Yá Ndióxi. ⁴ Te cachí-yu: “Ñá ndáá sá quíxí Xítóhó Jesucristú ñuyíú-a, chì núu quixi-gá te sá ndéé ama-gá sa ní quexìo-gá ní cùu. Te dàtná-ni quide-xi vitna ñi-ni duha ní quesaha-xi quide-xi ndéé cútnàhá ní ngáva ñuyíú, te ñi-ni duha quide-xi ndéé cútnàhá ní xíndecu cue ñani tnàhá-ó ndéé sanaha, te ñi-ni duha quide-xi ndéé ní sáá nduu ní xíhí-güedé, te ñi-ni duha quide-xi

ndée vitna”, duha cáháⁿ-yu. ⁵ Te ñucùuⁿ cadá-yu vá cadá cuendá-yu sá Yá Ndiöxí ní cáháⁿ-gá te ní ngúndecu andiu ndihí ñuyíu-a, te diu-gá ní quide ní quene ñuhu yìchí xítí ndute ní ngúndecu-xi ñⁿ xio. ⁶ Te ñⁿ xito ní dándáá Yá Ndiöxí ndute ñuyíu-a ní dándáá-gă nchaa sá ió. ⁷ Te Yá Ndiöxí ní cachí-gá sá cùndecu-ni ñuyíu-a ndihí andiu ndée ná sáa nduu càda-gá nchaa nàcuáa ní cáháⁿ-gá sá cúu-xí nchaa ñáyiu ndècu ichi cuehé ichi duha, te dàvá-áⁿ danàa-gá nchaa ñáyiu-áⁿ chi cáyú andiu ndihí ñuyíu-a.

⁸ Te nchaa nchòhó ñáyiu ío cùu iní-í, ío cuhuⁿ iní-ndó tnùhu na càháⁿ-í-a, chi Yá Ndiöxí ñá túú sàni iní-gá dàtná sání iní méé-ó, te ñⁿ nduu cùu-xi datná úxí cièndú cuíá, te úxí cièndú cuíá-ăⁿ cúu-xí dàtná ñⁿ nduu sá cúu-xí-gă. ⁹ Te Yá Ndiöxí ñá túú dàna ndodo iní-gá vá cadá-gă ñⁿ sá càháⁿ-gá dàtná cächí cue ñáyiu sá dáná ndòdo iní-gá cada-gá ñⁿ sá càháⁿ-gá, chi ñucùuⁿ tnahí dàcaca-gá nduu cuendá sá ío cùndahú iní ñáhá-gă xii-o, te cuìní-gá sá ncháá ñáyiu ndixi túu iní-yu sá ñà túú quide váha-yu ndècú-yu te tuhá-yu ichi-gá, te ducaⁿ quide-gá chi cuìní-gá sá vă cuíta nihnu ni ñⁿ-yu.

¹⁰ Te dàtná quidé cuè ñadúhú quíhu-güedé ñⁿ vehe dùhu-güedé òré ñá túú yìhi iní xítóhó vehe-áⁿ, te ducaⁿ càda Xítóhó Jesucrístú chi nduu ñà túú yìhi iní ñáyiu ñuyíu-a quixi tucu-gá, te dàvá-áⁿ cada-xi andiu dàtná quidé-xí òré níhi vìhi caháⁿ ñúhu, te diu-ni òré-áⁿ ndoñuhu àndiu, te cáyú nchaa chódíní, te cáyú tucu tnàhá ñuyíu-a ndihí nchaa sá ió.

¹¹ Te vitna nchòhó sa xìní-ndó sã náá ñùyíu-a te xíáⁿ ío xìni ñuhu-xi cada váha-ndo cùndecu-ndo,

te cada-ndo nàcuáa cuení méé Yă Ndiöxí cunduu.
¹² Te ío nducu ndèe-ndo ducaⁿ cada-ndo cuendá
 ducaⁿ ndihi-ni sáá nduu càda-gá nchaa nàcuáa
 càháⁿ-gá, te ducaⁿ nchòhó cundecu túha-ndo sáá
 nduu-ăⁿ. Te diu-ni nduu-ăⁿ ndoñuhu àndiu chi
 cáyú-xi, te diu-ni ducaⁿ ndoñuhu tucu nchaa
 chódíní chi ndihi-di cáyú. ¹³ Te nchoo ndètu-o sáá
 nduu cundecu-o ìⁿ ñuyíú sáá, te quíní-ó ìⁿ andiu
 saa datná ní cachí Yă Ndiöxí, te yăcáⁿ chi mee-nă
 cue ñáyiú quide váha cundecu.

¹⁴ Te nchòhó ñáyiú ío cùu iní-í, nini ndètu-ndo sáá
 nduu dùcaⁿ cada-xi ío nducu ndèe-ndo cada-ndo
 mee-ni sá váha cundecu-ndo ichi Yă Ndiöxí, te
 cundecu nahi-ndo, te cada-ndo nchaa nacuáa
 vá cùndècu cuéchi-ndo núú-gă. ¹⁵ Te ío cada
 cuendá-ndó sá dăcaca-gá nduu dùcaⁿ cada-gá chi
 cuení-gá sá ncháá ñáyiú naníhí tăhú-yu. Te té
 Păblú tée ío cùu iní-ó ndècu ndihi-o ichi Xítohó
 Jesucristú diu-ni nàcuáa càháⁿ-í-a diu-ni ducaⁿ nă
 tee-dé ìⁿ núú tûtú ní dáquixí-dě ndaha-ndo, te
 ní tee-dé nàcuáa ní dăcáhú ìní ñáhá Yă Ndiöxí
 xii-dé. ¹⁶ Te diu-ni ducaⁿ càháⁿ-dé nchaa dava-gá
 núú tûtú cādŭha-dé, te dava tnúhu càháⁿ-dé ío úhú
 tecú tnùní-ó, núú xiăⁿ ñáyiú ñă túú cùtnuní váha
 iní-xi, ñáyiú ío yáchí sàndáá iní-xi ìⁿ tnúhu, ñáyiú-ăⁿ
 tècú tnùní dátńi-yu nchaa tnúhu ní chídó tnùní-dé,
 ndihi nchaa dava-gá tnúhu yòdo tnuní núú tûtú Yă
 Ndiöxí, te sá dúcáⁿ quidé-yu te dacuŭta nihnú-yu
 mée-yu.

¹⁷ Te nchòhó ñáyiú ío cùu iní-í, sa cùtnuní
 iní-ndó nàcuáa quide dava ñáyiú, núú xiăⁿ ío
 xini ñuhu-xi quíhi iní-ndó cundecu-ndo cuendá
 ducaⁿ cundecu-ni-ndo ichi-gá, te vá dáñă-ndó

mèe-ndo dandahú ñáhá nchàa cue téé ndècu ichi cuehé ichi duha, chi cue téé-áⁿ ñà túú sàni váha iní-güedé cuendá tnúhu Yá Ndiöxí. Te núu na dàña-ndo mee-ndo dandahú ñáhá-güedě xii-ndo te vá cündècu váha-gá-ndó ìchi-gá dàtná ndécú-ndó vitna. ¹⁸ Te nchòhó uuⁿ-gá uuⁿ-gá cuita cutnùní-gá iní-ndó quǎhíⁿ nchaa nàcuáa ta chindee ñaha Xítóhó Jesucristú xii-ndo cuǎháⁿ. Te ducaⁿ ïo-gá cuita cutnùní iní-ndó nchàa nacuáa sàni iní-gá, te diu-gá cúú-gǎ Yaá ní dácǎcu nihnu ñaha xii-o núú ùhú núú ndàhú. Te chí ná càchí-ó sǎ ïo càhnu cuu-gá cuěi vitna té cuěi ndée núú cuàháⁿ núú vǎxi. Te ducaⁿ na cünduu. Te ío chí cádá ndèe iní-nǎ vitna.

Tnúhu ní cáháⁿ yă ndiõxí xito cùu uú
New Testament in Mixtec, Peñoles (MX:mil:Mixtec,
Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

872f7754-0986-5ecd-a059-925a708a6939